

La stela vign digl lenn

A Landquart ò gia li l'occurrènz da teir sen la distanza da 50 meters per tiradours e tiradouras da diesch anfignen 20 onns. Passa 60 giovens e giuvenils on musso lour saveida e tratg, tar bungas cundiziuns da teir, resultats excellents cun l'arma da caliber pitschen. Tg'igls mats e las mattas son eir anturn cun l'arma, tgi la disciplina è avant mang e tgi vign er do adatg cun manevrar l'arma è en maret dallas persungas tgi magnan igls curs da teir ainten las regiuns. Egn da chels ò er li a Rona e chegl per la regiun Alvra e la persunga tgi s'angascha igl pi fitg è Not Netzer da Savognin. Linus Maissen dad Alvagni è turno a tgesa cun la medaglia d'argient. Igl mattatsch dad 11 onns è nia sagond ainten la categoria digls giuvenils cun 40 participants, per el en grond success. Tratg ò el 188 puncts da 200 puncts pussebels. Gudagnea la concurrenza ò Andri Quinn da Trimmis cuagl resultat da 190 puncts. Cumpletto igl podest ò Fabian Schmid da Tusang. Tar Linus Maissen

ins pò an veir senn deir tgi la stela vign digl lenn. Sies bab è nign oter tgi Toni Ardüser, tg'è sto ed è anc adegna en tiradour da vaglia

ed tg'ò gia success ainten la sia carriera da teir sen camp regional, cantunal e naziunal. (fmr / gns)



Igls futurs matscheurs. (da san.) Linus Maissen, Andri Quinn e Fabian Schmid. Foto Gion Nutegn Stgier

CLUB DA BALLAPE SURSES

Ena clera victorgia

Gion Nutegn Stgier / FMR

Igl return ainten la 4. liga è reuschia agl CB Surses cun gudagner orsoura l'amprema parteida digl campinadi 2022 / 23 cun 2:4 ancunter la sagonda equipa da Schluein / Glion. Pigls Sursetters on do varsaquants giuieders pi giovens a ballape.

Igl campinadi da ballape 2022/23 dallas ligas pi bassas è lantschea e damai er pigl CB Surses. Pigl ampren gi ò l'equipa da Philipp Berri gia dad eir an Surselva per dar cunter igl sagond team da Schluein / Glion. Tar chel inscunter èn igls Sursetters sa mussos dalla sia miglra vart e fatg darar l'impressiun da perder la parteida. Remarcabel è tg'igl CB Surses ò do cun blers juniors e dasperas varsaquants giuieders pi rutinos scu per exaimpel Gianluca Augustin, Dario Kolb e Manuel Simonet.

Tignia en penalti

Scumanzo ò igl gi tot oter tgi bagn pigls giasts da Surses cun signier Dario Kolb angal siva dus minutas en autogol. Igl CB Surses ò reagea

dalunga sen chel retard e marco otg minutas sessour igl pari. Manuel Simonet ò profito d'en bellezza pass da Robin Demarmels per far igl 1:1. Ainten la 20avla minuta ò lez mano igl CB Surses cun en colp da testa cun 2:1 an avantatg. Pac siva ò Yanis Kaufmann, igl goli dall'equipa surmirana, fatg en faul ingist ed igl arbirer ò do en penalti cunter igl CB Surses. Igl «culpant» ò pero tignia igl penalti ed evito cotras igl 2:2. Ensatge pi dei ègl cuzzo anfignen tgi egna dallas dus squadras ò marco igl ampren gol siva dalla pòssa. Signia chel on igls giasts da Surmeir e chegl siva 62 minutas cun far Mauro Simonet igl 3:1 pigl CB Surses. Cun en conter siva 75 minutas ò Manuel Simonet procuro pigl 4:1 pigls Sursetters e damai er gist per la decisiun. Igl sagond gol da Schluein / Glion, tigl resultat final da 4:2 è sto pac oter tgi cosmectia digl resultat curt avant la fegn digl gi.

CB Surses: Yanis Kaufmann, Ivano Simonet, Gianluca Augustin, Dario Kolb, Robin Demarmels, Mauro Simonet, Laurin Frigg, Manuel Simonet, Adriano Simonet, Flurin Demarmels, Julian Jenal. Reserva: Nico Demarmels, Floren Dinaj, Valentin Nauli, Raphael Poltera, Matteo Sutter, Aurel Tschanner.



Robin Demarmels è ena ferma pitga pigl CB Surses. Er cunter Schluein / Glion.

Foto Gion Nutegn Stgier